



Broj: 05/1-50-15-26-67-6/20  
Sarajevo, 12. 2. 2020.

PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM  
DOM NARODA

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 12-02-2020

Organizaciona jedinica	Klasifikaciona oznaka	Redni broj	Broj priloga
05/1-50-15		609	20

**PREDMET: Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2019. godinu**

Poštovani,

U skladu sa članom 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine ("Službeni glasnik BiH" broj 36/08) i članom 9. Poslovnika o radu Nezavisnog odbora kao nezavisnog tijela policijske strukture BiH ("Službeni glasnik BiH" broj 93/09) Nezavisni odbor je na 67. sjednici održanoj 28. 1. 2020. godine usvojio Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2019. godinu i dostavlja ga Parlamentarnoj skupštini BiH na usvajanje.

S poštovanjem,



**Prilog: Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2019. godinu na bosanskom, hrvatskom i srpskom jeziku**

Dostavljeno:

- Naslovu
- a/a



---

Broj: 05/1-50-15-26-67-5/20

Sarajevo, 28. 1. 2020.

## IZVJEŠTAJ

**o radu Nezavisnog odbora kao nezavisnog tijela policijske strukture Bosne i  
Hercegovine za 2019. godinu**

**Januar 2020. godine**

## SADRŽAJ

<b>POGLAVLJE I. UVODNE NAPOMENE .....</b>	<b>3</b>
<b>POGLAVLJE II. NADLEŽNOSTI NEZAVISNOG ODBORA .....</b>	<b>4</b>
<b>POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA.....</b>	<b>4</b>
<b>Odjeljak A. Realizacija zadataka održavanjem redovnih sjednica Nezavisnog odbora.....</b>	<b>5</b>
<b>Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2019. ....</b>	<b>13</b>
<b>1. Posjeta Graničnoj policiji BiH 8. 7. 2019. ....</b>	<b>14</b>
<b>2. Posjeta Direkciji za koordinaciju policijskih tijela BiH 24. 7. 2019. ....</b>	<b>15</b>
<b>3. Posjeta Državnoj agenciji za istrage i zaštitu 23. 9. 2019. ....</b>	<b>16</b>
<b>POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA.....</b>	<b>17</b>
<b>POGLAVLJE V. ADMINISTRATIVNO-TEHNIČKA PODRŠKA RADU.....</b>	<b>18</b>
<b>POGLAVLJE VI. PREPORUKE I ZAKLJUČCI.....</b>	<b>18</b>

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 67. sjednici, održanoj 28. 1. 2020, usvojio i Parlamentarnoj skupštini Bosne i Hercegovine podnosi sljedeći

## **I Z V J E Š T A J**

### **o radu Nezavisnog odbora kao nezavisnog tijela policijske strukture Bosne i Hercegovine za 2019. godinu**

#### **POGLAVLJE I. UVODNE NAPOMENE**

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine ("Službeni glasnik BiH", broj 36/08), kao nezavisno tijelo Parlamentarne skupštine BiH.

Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH ("Službeni glasnik BiH", br. 20/14 i 53/17), i to:

1. Tatjana Klječanin-Martić, predsjednica Nezavisnog odbora,
2. Enes Obralića, prvi zamjenik predsjednice Nezavisnog odbora,
3. Mato Jozić, drugi zamjenik predsjednice Nezavisnog odbora,
4. Adisa Begić, članica Nezavisnog odbora,
5. Ilma Mehić-Jusufbašić, članica Nezavisnog odbora,
6. Nikola Džambas, član Nezavisnog odbora,
7. Mate Miletić, član Nezavisnog odbora,
8. Ljubomir Kuravica, član Nezavisnog odbora,
9. Vladimir Jurišić, član Nezavisnog odbora.

- Dopisom broj: 01,02,05/1-34-1-1382/18 od 7. 6. 2018. predsjednica Nezavisnog odbora Tatjana Klječanin-Martić podnijela je Zahtjev za razrješenje dužnosti člana Nezavisnog odbora kao nezavisnog tijela policijske strukture BiH.

Dom naroda Parlamentarne skupštine BiH je na 41. sjednici, održanoj 27. jula 2018, donio Odluku o razrješenju dužnosti člana Nezavisnog odbora kao nezavisnog tijela policijske

strukture BiH Tatjane Klječanin-Martić, dok Predstavnički dom Parlamentarne skupštine BiH navedeni zahtjev nije razmatrao.

## **POGLAVLJE II. NADLEŽNOSTI NEZAVISNOG ODBORA**

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH; objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeće ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

## **POGLAVLJE III. IZVRŠENJE ZADATAKA IZ NADLEŽNOSTI NEZAVISNOG ODBORA**

Osnovna nadležnost Nezavisnog odbora je provođenje procesa odabira kandidata za rukovodioce i zamjenike rukovodilaca policijskih tijela BiH, te u vezi s tim objavljivanje javnih konkursa i razmatranje prijava kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.

U vezi s navedenim, Nezavisni odbor je u 2019. godini proveo i u okvirima svoje nadležnosti okončao proceduru odabira kandidata za izbor direktora Državne agencije za istrage i zaštitu. Nezavisni odbor je u toku 2019. godine redovno održavao komunikaciju s rukovodiocima policijskih agencija po svim bitnim pitanjima iz njihovog djelokruga, s posebnim naglaskom

na aktivnosti koje su policijska tijela preduzimala u vezi s događanjima koja su izazivala veću medijsku pažnju.

Osim ove nadležnosti, Nezavisni odbor nadležan je i za predlaganje smjenjivanja rukovodilaca i zamjenika rukovodilaca policijskih tijela BiH, te iniciranje pokretanja disciplinskih postupaka protiv rukovodilaca policijskih agencija BiH.

#### **Odjeljak A. Realizacija zadataka održavanjem sjednica Nezavisnog odbora**

U izvještajnom periodu Nezavisni odbor održao je 12 redovnih sjednica na kojima su ukupno razmatrane 49 tačke dnevnog reda i doneseno 10 zaključaka.

Broj i datum održavanja sjednice	Broj razmatranih tačaka dnevnog reda na sjednici	Broj prisutnih članova sjednicama Nezavisnog odbora	Broj članova koji nisu bili prisutni sjednicama Nezavisnog odbora	Zakazivane pa otkazivane sjednice iz objektivnih razloga
55. / 15. 1. 2019.	4	7	2	
56. / 11. 2. 2019.	4	8	1	
57. / 11. 3. 2019.	4	8	1	
58. / 23. 4. 2019.	4	8	1	
59. / 20. 5. 2019.	1	7	2	
60. / 11. 6. 2019.	6	8	1	29. 5. 2019.
61. / 15. 7. 2019.	5	7	2	
62. / 22. 8. 2019.	3	8	1	
63. / 23. 9. 2019.	4	8	1	
64. / 21. 10. 2019. i nastavak 64. / 4. 11. 2019.	6	8	1	
65. / 11. 11. 2019.	3	8	1	
66. / 10. 12. 2019.	5	8	1	

Nezavisni odbor je na sjednicama razmatrao pitanja iz svoje nadležnosti, od kojih izdvajamo:

Na 55. sjednici Nezavisnog odbora, održanoj 15. 1. 2019, razmatrana je informacija Direkcije za koordinaciju policijskih tijela BiH koja je Nezavisnom odboru dostavljena u skladu sa zaključkom sa 54. sjednice a u vezi s preduzetim aktivnostima u predmetu Nezir Čolaković. Također, u vezi s tim Nezavisni odbor razmatrao je i dopis Elvise Rozića, državnog službenika u Direkciji za koordinaciju policijskih tijela BiH i člana Disciplinske komisije za teže povrede službenih dužnosti policijskih službenika Direkcije za koordinaciju policijskih tijela BiH. Nakon rasprave članovi Nezavisnog odbora jednoglasno su primili k znanju Informaciju Direkcije za koordinaciju policijskih tijela BiH kojoj su priložili dopis Elvise Rozića.

Razmatran je i Prijedlog izvještaja o radu Nezavisnog odbora Parlamentarne skupštine Bosne i Hercegovine kao nezavisnog tijela policijske strukture Bosne i Hercegovine za 2018. godinu koji je nakon rasprave jednoglasno usvojen.

Na istoj sjednici razmatrana je informacija o posjeti članova Nezavisnog odbora Direkciji za koordinaciju policijskih tijela BiH na kojoj se, u skladu sa zaključkom s prošle sjednice, razgovaralo o temi osiguranja predsjedavajućeg Predsjedništava BiH Milorada Dodika, te je jednoglasno usvojen sljedeći

#### **ZAKLJUČAK**

Nezavisni odbor Parlamentarne skupštine BiH zahtijeva od Direkcije za koordinaciju policijskih tijela BiH informaciju o tome da li je navedena policijska agencija angažirana na osiguranju člana Predsjedništva BiH iz Republike Srpske Milorada Dodika i, ako jeste, od kada navedene poslove izvršava, a shodno sastanku održanom u prostorijama Direkcije za koordinaciju policijskih tijela BiH 18. 12. 2018, kojem su prisustvovali članovi Nezavisnog odbora i rukovodstvo Direkcije za koordinaciju policijskih tijela BiH.

Razmatrani su i dopis BH konzorcija proizvođača policijske i vojne opreme i dopis Privredne komore Federacije BiH, nakon čega je jednoglasno usvojen sljedeći

#### **ZAKLJUČAK**

Nezavisni odbor razmatrao je dopis BH konzorcija proizvođača policijske i vojne opreme i dopis Privredne komore Federacije BiH, te s obzirom na prirodu i sadržaj predmetnih materijala zaključio da ih dostavi Vijeću ministara BiH i Ministarstvu sigurnosti BiH na daljnju nadležnost.

Na 56. sjednici Nezavisnog odbora, održanoj 11. 2. 2019, razmatran je i jednoglasno primljen k znanju dopis koji je Direkcija za koordinaciju policijskih tijela, u skladu sa zaključkom s prošle sjednice, dostavila ovom tijelu, a u vezi s angažiranjem ove policijske agencije na osiguranju člana Predsjedništva BiH iz Republike Srpske Milorada Dodika.

Razmatrana je i predstavka E.H. nakon čega su članovi Nezavisnog odbora jednoglasno zaključili da nisu nadležni za postupanje po ovoj predstavi, te ju je potrebno dostaviti Ministarstvu unutrašnjih poslova Tuzlanskog kantona na eventualni postupak i nadležnost.

Na 57. sjednici Nezavisnog odbora, održanoj 11. 3. 2019, razmatran je dopis – zahtjev BH konzorcija proizvođača policijske i vojne opreme, nakon čega je jednoglasno usvojen sljedeći

#### **ZAKLJUČAK**

Nezavisni odbor zaključio je da Direkciji za koordinaciju policijskih tijela BiH, Državnoj agenciji za istrage i zaštitu i Graničnoj policiji BiH dostavi upit da se izjasne na okolnosti zahtjeva BiH konzorcija proizvođača policijske i vojne opreme dostavljenog Nezavisnom odboru 15. 2. 2019. u dijelu koji je opisan samo u prvom pasusu, odnosno da li rade na izradi vlastitih pravilnika o izgledu policijske uniforme službenika policijske agencije kojom rukovode.

Također, Nezavisni odbor je na 57. sjednici, a u vezi s rezultatima i aktivnostima policijskih agencija u 2018. godini, jednoglasno usvojio i sljedeći

#### **ZAKLJUČAK**

Traži se od Direkcije za koordinaciju policijskih tijela BiH, Državne agencije za istrage i zaštitu BiH i Granične policije BiH dostavljanje izvještaja o radu za 2018. godinu.

Na istoj sjednici članovi Nezavisnog odbora jednoglasno su usvojili sljedeći

#### **ZAKLJUČAK**

Nezavisni odbor razmatrao je sve učestalije usmene zahtjeve usmjerene prema sekretaru Nezavisnog odbora za dostavu određene dokumentacije Nezavisnog odbora. U tom smislu Nezavisni odbor nastavit će dosadašnju praksu da razmatra samo pisane zahtjeve za dostavu bilo kakvih informacija ili materijala dostavljene od bilo koga te će se u tom smislu Nezavisni odbor, odnosno osoba koja rukovodi Nezavisnim odborom, očitovati isključivo po



pisanim zahtjevima. Na usmene zahtjeve sekretar Nezavisnog odbora ne može davati bilo kakve informacije ili dokumentaciju kojom raspolaže ovo tijelo i koji su naslovljeni na ovo tijelo.

**Na 58. sjednici Nezavisnog odbora, održanoj 23. 4. 2019,** razmatran je Izvještaj o radu Granične policije BiH za 2018. godinu koji je rukovodstvo Granične policije BiH dostavilo Nezavisnom odboru u skladu sa zaključkom s 57. sjednice. U vezi s tim, na sjednicu su pozvani i prisustvovali joj Zoran Galić, direktor Granične policije BiH, i Fahrudin Halač, zamjenik direktora Granične policije BiH, kako bi s članovima Nezavisnog odbora razmatrali dostavljeni materijal. Razgovarali su i o trenutnom stanju u Graničnoj policiji BiH, problemima s kojima se susreću u radu, migrantskoj krizi koja je gorući problem u BiH, o sigurnosti granične linije, tehničkom održavanju - servisiranju oružja u Graničnoj policiji BiH, nedostatku velikog broja policijskih službenika u Graničnoj policiji BiH, o saradnji s drugim policijskim agencijama te drugim pitanjima iz domena rada Granične policije BiH. Nakon rasprave, članovi Nezavisnog odbora jednoglasno su primili k znanju Izvještaj o radu Granične policije BiH za 2018. godinu.

Također, razmatrani su i dopisi koji su u skladu sa zaključkom s 57. sjednice dostavili Direkcija za koordinaciju policijskih tijela BiH, Državna agencija za istrage i zaštitu i Granična policije BiH, a u vezi sa izjašnjenjem na okolnosti zahtjeva BH. konzorcija proizvođača policijske i vojne opreme.

**Na 59. sjednici Nezavisnog odbora, održanoj 20. 5. 2019,** razmatran je Izvještaj o radu Državne agencije za istrage i zaštitu za 2018. godinu koji je rukovodstvo Državne agencije za istrage i zaštitu dostavilo Nezavisnom odboru u skladu sa zaključkom s 57. sjednice. U vezi s tim, na sjednicu su pozvani i prisustvovali joj Perica Stanić, direktor Državne agencije za istrage i zaštitu, i Đuro Knežević, zamjenik direktora Državne agencije za istrage i zaštitu, kako bi s članovima Nezavisnog odbora razmatrali dostavljeni materijal.

Razgovarali su o trenutnom stanju u Državnoj agenciji za istrage i zaštitu, problemima s kojima se susreću u radu, migrantskoj krizi, Zakonu o policijskim službenicima BiH, Zakonu o Državnoj agenciji za istrage i zaštitu, kadrovskoj popunjenosti, o nacionalnoj strukturi zaposlenih u ovoj policijskoj agenciji, tehničkom održavanju - servisiranju oružja u Državnoj agenciji za istrage i zaštitu, o saradnji s Tužilaštvom BiH, Interpolom i drugim policijskim agencijama kao i o značajnim rezultatima koje su ostvarili u 2018. godini.

Nakon rasprave, članovi Nezavisnog odbora jednoglasno su primili k znanju Izvještaj o radu Državne agencije za istrage i zaštitu za 2018. godinu.

Na 60. sjednici Nezavisnog odbora, održanoj 11. 6. 2019, razmatran je Izvještaj o radu Direkcije za koordinaciju policijskih tijela BiH za 2018. godinu koji je rukovodstvo Direkcije za koordinaciju policijskih tijela BiH dostavilo Nezavisnom odboru u skladu sa zaključkom s 57. sjednice. U vezi s tim, na sjednicu su pozvani i prisustvovali joj Mirsad Vilić, direktor Direkcije za koordinaciju policijskih tijela BiH, te Ivica Bošnjak i Ranko Vuković, zamjenici direktora Direkcije za koordinaciju policijskih tijela BiH, kako bi s članovima Nezavisnog odbora razmatrali dostavljeni materijal. Razgovarali su i o trenutnom stanju u Direkciji za koordinaciju policijskih tijela BiH, problemima s kojima se susreću u radu, o kadrovskoj popunjenosti i pravilniku o sistematizaciji radnih mjesta u Direkciji za koordinaciju policijskih tijela, Interpolu, Europolu, Selec, tehničkom održavanju - servisiranju oružja u Direkciji za koordinaciju policijskih tijela BiH, saradnji s drugim policijskim agencijama s naglaskom na pružanje pomoći Graničnoj policiji BiH, a u vezi s migrantskom krizom u BiH, saradnji sa Sudom i Tužilaštvom BiH kao i Agencijom za forenzička ispitivanja i vještačenja. Nakon rasprave, članovi Nezavisnog odbora jednoglasno su primili k znanju Izvještaj o radu Direkcije za koordinaciju policijskih tijela BiH za 2018. godinu.

Na istoj sjednici članovi Nezavisnog odbora razmatrali su anonimnu predstavku koju su navodno potpisali policijski službenici iz sve tri agencije u sastavu Ministarstva sigurnosti BiH te jednoglasno utvrdili da sadržaj predstavke nije u nadležnosti Nezavisnog odbora.

Na 61. sjednici Nezavisnog odbora, održanoj 15. 7. 2019, članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Granične policije BiH od 8. 7. 2019.

Dalje, članovi Nezavisnog odbora jednoglasno su usvojili Odluku o raspisivanju Javnog konkursa za provođenje procedure odabira kandidata na poziciju direktora Državne agencije za istrage i zaštitu, te utvrdili tekst Javnog konkursa koji je bio objavljen u „Službenom glasniku BiH“, „Službenom glasniku Brčko Distrikta BiH, u dnevnim novinama: „Dnevni avaz“, „Glas Srpske“ i „Večernji list“, kao i na veb-stranici Parlamentarne skupštine BiH.

Na istoj sjednici članovi Nezavisnog odbora informirani su da su Enes Obralića, prvi zamjenik predsjednice Nezavisnog odbora, i Vladimir Jurišić, član Nezavisnog odbora,

održali sastanak s delegacijom TAIEX-ove Misije stručne procjene stanja, samostalnosti i odgovornosti organa za provođenje zakona u Bosni i Hercegovini 8. 7. 2019. u prostorijama Evropske komisije u BiH te da je tom prilikom najviše razgovarano o radu ovog tijela, postupanju po žalbama na rad rukovodilaca policijskih tijela, te o proceduri imenovanja direktora i zamjenika direktora policijskih tijela.

**Na 62. sjednici Nezavisnog odbora, održanoj 22. 8. 2019,** članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Direkcije za koordinaciju policijskih tijela BiH od 24. 7. 2019.

**Na 63. sjednici Nezavisnog odbora, održanoj 23. 9. 2019,** razmatrane su pristigle prijave na Javni konkurs za provođenje procedure odabira kandidata na poziciju direktora Državne agencije za istrage i zaštitu. Na Javni konkurs za izbor direktora Državne agencije za istrage i zaštitu BiH blagovremeno je pristiglo pet prijava. Nakon uvida u dostavljenu dokumentaciju traženu Javnim konkursom konstatirano je da urednu dokumentaciju imaju četiri kandidata te da će, nakon što Nezavisni odbor po službenoj dužnosti dopisom zatraži od nadležnih ministarstava unutrašnjih poslova dokaz o neosuđivanju, biti pozvani na intervju.

Nakon uvida u dostavljenu dokumentaciju traženu Javnim konkursom, konstatirano je da urednu dokumentaciju imaju četiri kandidata: Goran Zubac, Darko Ćulum, Perica Stanić i Žarko Laketa.

Uvidom u dokumentaciju Njegoša Jovanovića konstatirano je da nije priložio radnu biografiju (CV) sa izjavom o nacionalnom opredjeljenju u originalu ili od nadležnog organa ovjerenu kopiju dokumenta.

U vezi s tim, Nezavisni odbor jednoglasno je donio sljedeći

### **ZAKLJUČAK**

Nezavisni odbor zaključio je da prijavu kandidata Njegoša Jovanovića treba odbaciti zato što uz prijavu na Javni konkurs za provođenje procedure odabira kandidata za izbor direktora Državne agencije za istrage i zaštitu nije priložena originalna ili od nadležnog organa ovjerena kopija biografije (CV) sa izjavom o nacionalnom opredjeljenju, a što je jasno zahtijevano tekstom Javnog konkursa.

Na 64. sjednici Nezavisnog odbora, održanoj 21. 10. 2019. i 4. 11. 2019, razmatrane su Žalba i Urgencija Zajedničke advokatske kancelarije Pucar kao punomoćnika Njegoša Jovanovića za kojeg je Nezavisni odbor jednoglasno na 63. sjednici donio zaključak da njegovu prijavu na Javni konkurs za provođenje procedure odabira kandidata za izbor direktora Državne agencije za istrage i zaštitu odbacuje, nakon čega je jednoglasno usvojen sljedeći

#### ZAKLJUČAK

Nezavisni odbor zaključio je da Žalba na odluke Nezavisnog odbora nije dopuštena, o čemu će podnosilac Žalbe biti obaviješten, te uz obavještenje priložiti i izvod iz Zapisnika 63. sjednice Nezavisnog odbora, a koja se odnosi na navedeni predmet.

Razmatrana je i anonimna predstavka koja se odnosi na eventualno ispunjavanje uslova za penziju kandidata prijavljenog na Javni konkurs za provođenje procedure odabira kandidata za izbor direktora Državne agencije za istrage i zaštitu, nakon čega je jednoglasno usvojen sljedeći

#### ZAKLJUČAK

Potrebno je od Ministarstva unutrašnjih poslova Republike Srpske i Fonda za penzijsko i invalidsko osiguranje Republike Srpske zatražiti provjeru da li kandidati, čije su prijave prihvaćene u proceduri po Javnom konkursu za provođenje procedure odabira kandidata za izbor direktora Državne agencije za istrage i zaštitu („Službeni glasnik BiH“, broj 58/19), imaju uslove za odlazak u penziju zaključno s danom 21. 10. 2019.

Također, dogovoreno je da o ovom zaključku budu obaviješteni Vijeće ministara BiH i Ministarstvo sigurnosti BiH.

Na istoj sjednici obavljen je intervju s kandidatima koji su se prijavili i koji ispunjavaju uslove Javnog konkursa za provođenje procedure odabira kandidata za izbor direktora Državne agencije za istrage i zaštitu. Na intervju su se odazvala sva četiri pozvana kandidata: Darko Ćulum, Žarko Laketa, Perica Stanić i Goran Zubac.

S obzirom na usvojeni zaključak članovi Nezavisnog odbora jednoglasno su se dogovorili da sjednica bude prekinuta nakon obavljenog intervjua s kandidatima koji su se prijavili i koji ispunjavaju uslove Javnog konkursa za provođenje procedure odabira kandidata za izbor direktora Državne agencije za istrage i zaštitu i nastavljena odmah po dobivanju odgovora od

Ministarstva unutrašnjih poslova Republike Srpske i Fonda za penzijsko i invalidsko osiguranje Republike Srpske.

Sjednica je nastavljena 4.11.2019, na kojoj su članovi Nezavisnog odbora razmatrali dopis Ministarstva unutrašnjih poslova Republike Srpske i dopis Fonda za penzijsko i invalidsko osiguranje Republike Srpske, a koji se odnosi na ispunjavanje uslova za penziju kandidata čije su prijave prihvaćene u proceduri po Javnom konkursu za provođenje procedure odabira kandidata za izbor direktora Državne agencije za istrage i zaštitu nakon čega je uslijedilo ocjenjivanje i bodovanje kandidata radi sačinjavanja rang-liste.

Rang-lista uspješnih kandidata za poziciju direktora Državne agencije za istrage i zaštitu usvojena je jednoglasno.

## **R A N G - L I S T A**

### **uspješnih kandidata za poziciju direktora Državne agencije za istrage i zaštitu**

1. Stanić Perica (96,25 bodova)
2. Ćulum Darko (80,00 bodova)
3. Laketa Žarko (66,87 bodova)

Konačna rang-lista uspješnih kandidata je u skladu s članom 13. stav (2) Poslovnika o radu Nezavisnog odbora kao nezavisnog tijela policijske strukture BiH dostavljena ministru sigurnosti BiH na daljnje postupanje.

**Na 65. sjednici Nezavisnog odbora, održanoj 11. 11. 2019,** članovi Nezavisnog odbora jednoglasno su usvojili Izvještaj sa sastanka članova Nezavisnog odbora s rukovodstvom Državne agencije za istrage i zaštitu od 23. 9. 2019.

Razmatran je i Prigovor Zajedničke advokatske kancelarije Pucar nakon čega je jednoglasno usvojen sljedeći

## **ZAKLJUČAK**

U vezi s Prigovorom Zajedničke advokatske kancelarije Pucar, Nezavisni odbor konstatira da je na 63. sjednici donio odluku da se prijava kandidata Njegoša Jovanovića odbaci iz razloga koji su tada navedeni, o čemu je punomoćnik obaviješten aktom Nezavisnog odbora, broj:

05/1-50-15-26-63-6/19 od 23. 9. 2019. Na 64. sjednici Nezavisni odbor je, postupajući po žalbi, donio zaključak da žalba nije dopuštena, o čemu je obavijestio punomoćnike podnosioca aktom Nezavisnog odbora, broj: 05/1-50-15-26-64-8/19 od 23. 10. 2019. Kako je Nezavisni odbor već odlučivao po žalbi, ovo tijelo nema osnov da razmatra Prigovor izjavljen na zaključke Nezavisnog odbora sa 63. i 64. sjednice, o čemu obavještavamo podnosioca Prigovora. Zaštitu eventualno povrijeđenih prava može tražiti pred nadležnim sudom.

Na 66. sjednici Nezavisnog odbora, održanoj 10. 12. 2019, razmatran je Prijedlog plana rada Nezavisnog odbora kao nezavisnog tijela policijske strukture Bosne i Hercegovine za 2020. godinu koji je nakon rasprave jednoglasno usvojen.

#### **Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2019. godinu**

Planom rada Nezavisnog odbora za 2019. godinu predviđeno je održavanje pojedinačnih sastanaka s rukovodstvom Direkcije za koordinaciju policijskih tijela BiH, Državne agencije za istrage i zaštitu i Granične policije BiH. Cilj ovih sastanaka je uvid u rad i upoznavanje s problemima s kojima se u radu susreću rukovodioci policijskih agencija BiH. Nezavisni odbor obavlja zadatke iz svoje nadležnosti i putem izvještaja o radu koji dostavlja Parlamentarnoj skupštini BiH na razmatranje i usvajanje informira je o problemima u radu policijskih agencija BiH iz svoje nadležnosti.

Nezavisni odbor je u 2019. godini, u skladu s članom 18. Poslovnika o radu Nezavisnog odbora i Planom rada Nezavisnog odbora za 2019. godinu, obavio posjete:

<b>Posjete</b>	<b>Datum posjeta</b>
Graničnoj policiji BiH	8. 7. 2019.
Direkciji za koordinaciju policijskih tijela BiH	24. 7. 2019.
Državnoj agenciji za istrage i zaštitu	23. 9. 2019.

## **1. Graničnoj policiji BiH, 8. 7. 2019.**

Sastanak članova Nezavisnog odbora kao nezavisnog tijela policijske strukture BiH s Zoranom Galićem, direktorom Granične policije BiH, Fahrudinom Halačem, zamjenikom direktora Granične policije BiH, Draganom Kulićem, pomoćnikom direktora za organizaciju i operacije, i Radišom Samardžijom, načelnikom Kabineta direktora, održan je 8. 7. 2019. u prostorijama Granične policije BiH. U ime Nezavisnog odbora sastanku su prisustvovali Enes Obralića, prvi zamjenik predsjednice Nezavisnog odbora, Mate Miletić i Ljubomir Kuravica, članovi Nezavisnog odbora, te Ivana Lovrić, sekretarka Nezavisnog odbora.

Direktor Granične policije BiH na početku je istakao da su sigurnosni elementi u BiH uveliko narušeni migrantskom krizom te da su u značajnoj mjeri sve svoje resurse i kapacitete usmjerili na ugrožene tačke s ciljem zaštite državne granice. Najveći problem im predstavlja nedostatak policijskih službenika te je istakao da im u ovom trenutku pomoć pružaju policijski službenici Direkcije za koordinaciju policijskih tijela BiH. Naglasio je da nemaju pomoć kako u materijalno-tehničkom tako ni u finansijskom smislu pa se nameće problem osiguranja finansijskih sredstava za smještaj policijskih službenika koji su na ugroženim područjima.

Kada je riječ o kadrovskoj popunjenosti i zaposlenim u ovoj policijskoj agenciji, direktor je naglasio hitnost rješavanja problema nedostatka policijskih službenika. Istakao je da, prema Pravilniku o unutrašnjoj organizaciji i sistematizaciji radnih mjesta, trenutno nedostaje 375 policijskih službenika. Primani su novi policijski službenici, ali je istovremeno približno isti broj odlazio u penziju. Novim pravilnikom o unutrašnjoj organizaciji i sistematizaciji radnih mjesta koji je Granična policija radila u saradnji s njemačkom saveznom policijom, a koji bi donekle riješio problem, predviđeno je da se smanji broj rukovodećih službenika, a poveća broj službenika na terenu. Međutim, taj prijedlog nije prošao resorno ministarstvo.

Kada je riječ o tehničkom održavanju - servisiranju oružja u Graničnoj policiji BiH, rukovodstvo Granične policije istaklo je da oni do donošenja novog pravilnika, koji je u izradi, postupaju po Pravilniku o načinu držanja, nošenja oružja i municije koji je donijelo Ministarstvo sigurnosti BiH.

Rukovodstvo Granične policije BiH istaklo je da su u proteklom periodu ostvarili značajne rezultate po pitanju krijumčarenja ljudi, prekograničnog kriminaliteta, procesuiranju osoba povezanih s trgovinom narkotika kao i otkrivanja krivotvorene dokumentacije.

Dalje u razgovoru direktor je naglasio da ima korektnu saradnju s drugim policijskim agencijama u BiH.

## **2. Direkciji za koordinaciju policijskih tijela BiH, 24. 7. 2019.**

Sastanak članova Nezavisnog odbora kao nezavisnog tijela policijske strukture BiH s direktorom Direkcije za koordinaciju policijskih tijela BiH Mirsadom Vilićem, zamjenicima direktora Direkcije za koordinaciju policijskih tijela BiH Ivicom Bošnjakom i Rankom Vukovićem održan je 24. 7. 2019. u prostorijama Direkcije za koordinaciju policijskih tijela BiH. U ime Nezavisnog odbora sastanku su prisustvovali: Ilma Mehić-Jusufbašić, Mate Miletić i Ljubomir Kuravica, članovi Nezavisnog odbora, te Ivana Lovrić, sekretarka Nezavisnog odbora.

Direktor Direkcije za koordinaciju policijskih tijela BiH upoznao je članove Nezavisnog odbora o značajnim aktivnostima koje su imali u proteklom periodu, kao što su: osiguranje najvećeg sportskog olimpijskog festivala za mlade – EYOF, osiguranje Godišnje skupštine Evropske banke za obnovu i razvoj – EBRD, osiguranje obilježavanja godišnjice u Srebrenici, osiguranje dolaska predsjednika Turske Recepa Tayyipa Erdogana u Sarajevo i dr.

U nastavku razgovora s članovima Nezavisnog odbora direktor je istakao problem nedostatka velikog broja policijskih službenika u Direkciji za koordinaciju policijskih tijela BiH. Naglasio je da u ovom trenutku, po Pravilniku o unutrašnjoj organizaciji i sistematizaciji radnih mjesta, nedostaje oko 350 policijskih službenika. Trenutno je 50 kadeta na školovanju u Mostaru pa bi se njihovim dolaskom donekle smanjio broj policijskih službenika koji nedostaju. Također, u skladu s finansijskim sredstvima, počeo je i proces činovanja u Direkciji za koordinaciju policijskih tijela BiH, od čina samostalnog policajca do čina glavnog inspektora.

Rukovodstvo Direkcije za koordinaciju policijskih tijela BiH istaklo je da imaju dobru saradnju s drugim policijskim agencijama u BiH kao i Oružanim snagama BiH te Obavještajno-sigurnosnom agencijom BiH. Posebno su naglasili saradnju s Graničnom policijom BiH koja također ima problem nedostatka policijskih službenika, te Direkcija za koordinaciju policijskih tijela BiH, u skladu sa svojim mogućnostima, šalje svoje policijske službenike na državnu granicu a s ciljem zaštite koja je narušena migrantskom krizom.



U razgovoru s članovima Nezavisnog odbora direktor je istakao da Direkcija trenutno štiti 168 objekata na čitavoj teritoriji BiH što je regulirano Odlukom Vijeća ministara BiH o određivanju lica, objekata i vrijednosnih pošiljki koji se štite. Također, naglasio je da je u proceduri donošenje novog Zakona o policijskim službenicima BiH kojim se, između ostalog, predviđa eksterni premještaj policijskih službenika na nivou BiH. Takva izmjena bila bi veoma značajna za sve tri policijske agencije u BiH.

### **3. Državnoj agenciji za istrage i zaštitu, 23. 9. 2019.**

Sastanak članova Nezavisnog odbora kao nezavisnog tijela policijske strukture BiH s direktorom Državne agencije za istrage i zaštitu Pericom Stanićem i zamjenikom direktora Državne agencije za istrage i zaštitu Đurom Kneževićem održan je 23. 9. 2019. u prostorijama Državne agencije za istrage i zaštitu. U ime Nezavisnog odbora sastanku su prisustvovali: Adisa Begić, Nikola Džambas i Vladimir Jurišić, članovi Nezavisnog odbora, te Ivana Lovrić, sekretarka Nezavisnog odbora.

Na sastanku je razgovarano o realiziranim i planiranim aktivnostima Državne agencije za istrage i zaštitu za 2019. godinu, postignutim rezultatima u borbi protiv aktuelnih sigurnosnih izazova, s posebnim akcentom na terorizam i migrantsku krizu, kadrovsku popunjenost u Državnoj agenciji za istrage i zaštitu, o Zakonu o policijskim službenicima BiH i Zakonu o Državnoj agenciji za istrage i zaštitu, te o saradnji s Tužilašvom BiH i drugim policijskim agencijama u BiH.

Kada je u pitanju migrantska kriza, direktor je istakao da su sve od maja do 18. ovog mjeseca Graničnoj policiji BiH pružali pomoć. Na raspolaganju im je bilo od 15 do 30 pripadnika policijskih službenika iz Jedinice za specijalnu podršku Državne agencije za istrage i zaštitu. Međutim, od Ministarstva sigurnosti BiH tražili su i dobili saglasnost da obustave pomoć dva mjeseca, do 18. novembra, jer u oktobru policijski službenici Jedinice za specijalnu podršku učestvuju u EUFOR-ovoj vježbi „Brzi odgovor 2019“ koja će biti održana u BiH. Ono što posebno želi naglasiti jeste da sami finansiraju svoje policijske službenike. Nemaju nikakvu finansijsku niti materijalnu pomoć iz bilo kakvih donacija, osim iz budžetskih rezervi iz 2018. godine. Također, istakao je da je planirano potpisivanje sporazuma između policijskih agencija na nivou BiH, entitetskih i kantonalnih MUP-ova, a u vezi sa svim aktivnostima koje se tiču migrantske krize. Suština sporazuma je da će se sve aktivnosti finansirati iz budžeta

Bosne i Hercegovine ili doniranih sredstava, s naglaskom da jedni drugima neće zadirati u nadležnosti.

Direktor je istakao da su u proteklom periodu ostvarili dobre rezultate kada je u pitanju zapljena zlata i srebra (oko 150 kg zlata i 130 kg srebra). Zaplijenjena je i rekordna količina narkotika. Također, dobri rezultati su ostvareni i prilikom akcije KASA 1, 2 i 3 na području Istočnog Sarajeva i Mostara.

Što se tiče kadrovske popunjenosti u ovoj policijskoj agenciji, direktor je istakao da je trenutno u ovu agenciju primljeno 15 kadeta koji su od početka septembra na obuci u Mostaru.

Rukovodstvo Državne agencije informiralo je članove Nezavisnog odbora i o Zakonu o Državnoj agenciji za istrage i zaštitu. Istakli su da je Zakon prošao Vijeće ministara BiH te da je trenutno u proceduri u Parlamentarnoj skupštini BiH.

Također, direktor Državne agencije za istrage i zaštitu informirao je članove Nezavisnog odbora da je zadovoljan odnosima s drugim policijskim agencijama u BiH kao i s Tužilaštvom BiH, ali da bi mogli biti i bolji.

Razgovarano je i o međusobnoj saradnji i odnosima između direktora i zamjenika direktora Državne agencije za istrage i zaštitu što je ocijenjeno kao vrlo dobro, u nadi da će tako i ostati.

#### **POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA**

Rad Nezavisnog odbora pratili su i svim sjednicama prisustvovali predstavnici OHR-a. Sve sjednice Nezavisnog odbora pratili su zaposleni u Sektoru za odnose s javnošću Sekretarijata Parlamentarne skupštine BiH te predstavnici medija u BiH. Javnost se može upoznati s radom Nezavisnog odbora i putem akata koje je ovaj odbor usvajao i putem zapisnika, jer su objavljeni na internetskoj stranici Parlamentarne skupštine BiH. Na ovaj način osigurana je transparentnost rada Nezavisnog odbora.

Članovi Nezavisnog odbora su 8. 7. 2019. održali sastanak s delegacijom TAIEX-ove Misije stručne procjene stanja, samostalnosti i odgovornosti organa za provođenje zakona u Bosni i Hercegovini.


## POGLAVLJE V. ADMINISTRATIVNO-TEHNIČKA PODRŠKA RADU

Zajednička služba Sekretarijata Parlamentarne skupštine BiH je, prema Zakonu o nezavisnim i nadzornim tijelima policijske strukture u BiH, zadužena da pruža svu administrativno-tehničku podršku radu Nezavisnom odboru. Zajednička služba osigurala je potrebne uslove za rad Nezavisnog odbora angažiranjem stručnog osoblja, ali i osiguravanjem materijalno-tehničkih i drugih uslova za nesmetan rad.

## POGLAVLJE VI. PREPORUKE I ZAKLJUČCI

Nezavisni odbor realizirao je većinu programskih aktivnosti planiranih u 2019. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2019. godinu.



**PRILOG:** Tabela prikaz održanih sjednica i prisustvo članova Nezavisnog odbora u 2019. godini



**Napomena:** Tatjana Klječanin Maritić, predsjednica Nezavisnog odbora je dopisom broj: 01,02,05/1-34-1-1382/18 od 7.6.2018. godine, podnijela Zahtjev za razrješenje dužnosti člana Nezavisnog odbora kao nezavisnog tijela policijske strukture BiH.

Dom naroda Parlamentarne skupštine Bosne i Hercegovine je na 41. sjednici, održanoj 27. jula 2018. godine, donio je Odluku o razrješenju dužnosti člana Nezavisnog odbora kao nezavisnog tijela policijske strukture BiH Tatjane Klječanin Martić dok Predstavnički dom Parlamentarne skupštine navedeni Zahtjev nije razmatrao.